

四庫全書

經部

欽定四庫全書

六家詩名物疏卷三十二 明 馮復京 撰

小雅鹿鳴之什一

鹿鳴篇

苹

傳云苹萍也○夏小正七月湟潦生萍○周書曰穀雨
一日萍始生萍不生陰氣憤盈○淮南子云萍樹根于
水木樹根于土又云容華生萍萍生萍藻萍藻生浮草

凡浮生不根莖者生于萍藻○萬畢術曰老血爲萍聚血之精至黃泉也○埤雅曰萍一名萍無根而浮常與水平故曰萍也江東謂之藻言無定性漂流隨風周官萍氏掌水禁鄭氏云以不沈溺取名蓋使之幾酒謹酒也舊說萍善滋生一夜七子一曰浮于流水則不生于止水則一夕生九子故謂之九子萍也世說楊華入水化爲浮萍○雅翼云萍水上小浮萍無根但有小須垂水中然淮南云萍植根于水蓋萍以水爲地所垂者乃

是根今或反根于上為日所暴即死是與失土同也小雅食野之草毛氏以為此鄭氏以為非野所生非鹿所食易之曰賴蕭然古人以水草之交為藳則藳鹿亦食水草○箋云草賴蕭○爾雅云草賴蕭郭云今賴蒿也○初生亦可食○陸璣云葉青白色莖似筍而輕肥始生香可生食亦可蒸食○盧氏雜說云唐文宗問宰臣草是何草李珣曰是賴蕭上曰朕看毛詩疏草葉圓而花白叢生野

中似非籟蕭

按唐文宗所說詩疏與今本異

賓

說文賓所敬也○周禮小宰以官府之六聯合邦治二
曰賓客之聯事大宗伯以賓禮親邦國

按三禮賓有數等大行人掌大賓之禮及大客之儀
以親諸侯大賓要服以內諸侯也大客謂其孤卿以
此推之要服以外為小賓時聘之大夫士及為介來

者皆小客矣朝覲宗遇會同諸侯之爲賓者也時聘
殷頰諸臣之爲客者也賓客之聯事小宰合之燕饗
之禮宗伯職之九儀之命爵行人辨而等之牢禮餼
獻飲食之等數掌客掌之逆于疆聚橐致積將幣前
驅至朝詔位之類掌訝掌之野之委積司徒令修之
若公侯伯子男之相爲賓公侯伯子男之臣相爲客
其儀掌之司儀凡諸侯聘禮主國所以待賓者饗食
君親爲主尊賓也燕私樂之禮宗恩殺敬故聘禮曰

燕則上介爲賓賓爲苟敬宰夫獻也若諸侯無事卿大夫有勤勞之功與羣臣燕飲以樂之則于客內立一人爲賓餘爲衆賓記云若與四方之賓燕則公迎之大門內揖讓升與卿燕則大夫爲賓與大夫燕亦大夫爲賓燕義云使宰夫爲獻主臣莫敢與君亢禮也不以公卿爲賓而以大夫爲賓爲疑也然則燕四方之賓與國內之臣其禮惟迎不迎爲異若族燕之禮則文王世子云異姓爲賓膳宰爲主人不以同姓

爲賓者親親也不親主獻者尊君也士冠禮之賓主
人之僚友也鄉飲酒禮諸侯之鄉大夫三年大比獻
賢者能者于其君以禮賓之與之飲酒主人就先生
而謀賓介注云賢者爲賓其次爲介其次爲衆賓以
禮賓之將獻于王與鄉射之賓及衆賓皆鄉人之無
爵者也鄉飲酒義云立賓以象天立主以象地設介
僕以象日月立三賓以象三光坐賓于西北必南鄉
鄭以鄉飲酒義之篇具載四禮則鄉飲酒四事其儀

皆同也諸侯大射之禮大夫爲賓宰夫爲主人特牲
少牢士虞禮之賓皆助祭執事者也楚茨爲賓爲客
賓筵賓載手仇是天子助祭之臣亦稱賓也祭禮又
有內賓鄭玄云姑姊妹也其羣下自相飲亦尊一人
爲上賓左傳季氏飲大夫酒臧紇爲客國語公父文
伯飲南宮敬叔酒露睹父爲客是也鹿鳴之詩燕羣
臣嘉賓則賓指四方之賓及羣臣也

笙

詳見王風簧

白虎通云象萬物之生故曰笙

承筐

箋云飲之而有幣酬幣也食之而有幣侑幣也○禮書云食有侑食故有侑幣饗有酬爵故有酬幣儀禮公食大夫侑以束帛而庭實以皮大夫相食以束錦此食有侑幣也聘禮公于賓若不親食使大夫致之以侑幣致饗以酬幣亦如之大夫於賓若不親饗則公作大夫致之以酬幣士昏禮舅姑饗送者酬以束錦此饗有酬幣

也燕禮無用幣之文鹿鳴之詩燕羣臣嘉賓序曰既飲食之又實幣帛筐篚則所謂飲食者燕與食耳此燕有酬幣也孔穎達以飲食爲饗食非詩意也春秋傳曰酬幣宴貨以示容合好則燕未嘗不用酬幣特文不備禮器曰琥璜爵鄭氏以爲天子酬諸侯諸侯相酬之禮是天子饗諸侯諸侯相饗酬幣用玉酬幣亦謂之侑侑幣不謂之酬故春秋傳享醴皆曰宥以侑者勸酬之通稱也

蒿

爾雅云蒿藋郭璞曰今人呼青蒿香中炙啖者爲藋○
陸璣云蒿青蒿也荊豫之間汝南汝陰皆曰藋○爾雅
又云繁之醜秋爲蒿郭云春時各有種名至秋老成皆
通呼爲蒿○本草云草蒿一名青蒿一名方漬生華陰
川澤圖經云葉似茵陳蒿而背不白春生苗葉極細嫩
時人亦取雜諸香菜食之至夏高四五尺秋後開細淡
黃花花下便結子如粟米大衍義云根赤葉香○晏子

曰蒿草之高者也○筆談云青蒿一類自有青黃兩種
陝西綏銀之間蒿叢時有一兩株迥然青色土人謂之
香蒿莖葉與常蒿悉同但比常蒿色青翠一如松檜之
色至深秋餘蒿並黃此蒿猶青氣稍芬香恐古人所用
以此爲勝

按爾雅繁之醜秋爲蒿則所謂蒿者不專謂青蒿矣
爾雅繁蒿蔚著莢購蕭七種毛詩俱有之本草有茵
陳蒿邪蒿同蒿三種詩中不見皆蒿屬

燕

周禮大宗伯以饗燕之禮親四方之賓客掌客掌四方之賓客飲食之等數與其政治凡諸侯之禮上公三燕侯伯再燕子男一燕○燕禮記云燕朝服於寢若與四方之賓燕則公迎之大門內揖讓升賓爲苟敬席于阼階之西北面有胥不躋肺不啐酒其介爲賓無膳尊無膳爵與卿燕則大夫爲賓與大夫燕亦大夫爲賓○燕義云使宰夫爲獻主臣莫敢與君亢禮也不以公卿爲

賓而以大夫爲賓爲疑也俎豆牲體薦羞皆有等差所以明貴賤也○皇氏云燕禮折俎有酒無飯有二種若燕同姓夜則飲之其於異姓讓之而止○賈公彥云饗烹大牢以飲賓獻依命數在廟行之燕者其牲狗一獻四舉旅降脫屨升坐無算爵以醉爲度行之在寢此謂朝賓若聘客則皆一饗其燕與時賜無數又云燕有四等諸侯無事而燕一也卿大夫有王事之勞二也卿大夫有聘而來還與之燕三也四方聘客與之燕四也○

國語云先王之燕禮體解節折而共飲食之於是乎有折俎加豆酬幣宴貨以示容合好○韓詩說云夫飲之禮不脫屨而即序者謂之禮跣而上坐者謂之宴能飲者飲之不能飲者已謂之饁齊顏色均衆寡謂之沈閉門不出者謂之酒故君子可以宴可以饁不可以沈不可以酒

苓

陸璣云莖如釵股葉如竹蔓生澤中下地鹹處爲草真

實牛馬亦喜食之

四牡篇

周道

傳云岐周之道○漢書地理志右扶風郁夷縣注詩周道郁夷顏氏曰四牡詩周道倭遲韓詩作郁夷言使臣乘馬於此道○一統志郁夷城在陝西鳳翔府隴州

駱

爾雅云白馬黑鬣駱疏云鬣鬣也○說文云白馬黑鬣

尾○禮記云夏后氏駱馬黑鬣疏云夏尚黑故用黑鬣
○埤雅云爾雅曰白馬黑鬣駱廣雅云白馬朱鬣駱今
呼黃馬尾鬣一道通黑如界者爲駱蓋馬無分于黃白
若今衣脊絡縫故曰駱也明堂位云夏后氏駱馬黑鬣
此以別白馬朱鬣之駱也月令曰孟秋駕白駱此以別
黃馬黑鬣之駱也俗云駱馬善耐勞苦詩曰嘽嘽駱馬
言駱性善勞而今取息不平如此則以甚勞故也

騅

詩緝云鷦鷯也即郊子祝鷽氏司徒也一鳥而十四名鷽也佳其也鷽鷽也祝鷽也鷽鷽也鷽鷽也鷽鷽也楚鷽也鷽鷽也荆鷽也乳鷽也鷽鷽也鷽鷽也鷽鷽也鷽鷽也○通志云凡鳥之短尾者皆謂之佳惟夫不專名焉○爾雅云鷽其夫不注今鷽鷽○毛傳云鷽一宿之鳥箋云一宿者一意於所宿之木又云鳥之謹愿者人皆愛之○方言云鷽關東周鄭韓魏謂之鷽鷽其鷽鷽謂之鷽鷽關西秦漢之間謂之鷽鷽其大者謂之鷽鷽其小

者謂之鵒鳩或謂鷓鳩或謂鴉鳩或謂鶻鳩梁宋之間
謂之鵒鳩○陸璣云今小鳩也一名鷓鳩幽州人或謂
之鷓鳩梁宋之間謂之鷓揚州人亦然○左傳云祝鳩
氏司徒也注祝鳩孝故主教民○禽經云鷓上無尋鷓
上無常○聽聲考詳篇云雀聲慘毒鳩聲慈念○雅翼
云似班鳩而臆無繡采又頭有贅物之拙者不能爲巢
纔架數枝往往破卵無巢不能居天將雨則逐其雌鷓
則呼而反之鷓既孝鳥故漢授民七十者玉杖端以鳩

鳥爲飾

按鳩之類多而名亦煩雜故揚雄誤謂鵲鳩爲鷦又誤以鵲鳩爲戴勝嚴氏說鷦十四名而忘陸璣疏幽州謂之鷽鷽方言鷽鷽謂之鷽鷽羅氏謂鷽不能作巢陸農師亦云鷽拙而安疑即歐陽永叔所云拙鷽也然歐陽子說拙鷽又不正名爲鷽

杞

詩緝云詩有三杞將仲子無折我樹杞柳屬也有臺南

山有杞湛露在彼杞棘山木也此詩集于芑杞雅杖杜
北山言采其杞四月隰有杞檍枸杞也○爾雅云杞枸
櫬注今枸杞也○廣雅云地筋枸杞○陸璣云一名苦
杞一名地骨春生作羹茹微苦其莖似莓子秋熟正赤
莖葉及子服之輕身益氣○本草云枸杞味苦寒久服
堅筋骨輕身不老一名杞根一名地骨一名枸杞心名
地輔羊乳脚暑仙人杖西王母杖生常山平澤及諸丘
陵阪岸冬採根春夏採葉秋採莖實○抱朴子云家菜

一名托盧或名天精卻老地骨○日華子云地仙苗即
枸杞○圖經云春生苗葉如石榴葉而軟薄堪食俗呼
爲甜菜莖幹高三五尺作叢六七月生小紅紫花隨結
紅實形微長如棗核其根名地骨與枸棘相類其實形
長而枝無刺者真枸杞也圓而有刺者枸棘也世傳蓬
萊縣南丘村多枸杞高者一二丈其根蟠結甚固鄉人
多壽考亦飲食其水土之品使然耳○沈存中云陝西
極邊生枸杞高丈餘大可作柱葉長數寸無刺根皮如

厚朴甘美異於諸處實圓如櫻桃全少核暴乾如餅極
膏潤有味○寇氏衍義云凡杞未有無刺者但此物小
則多刺大則少刺如酸棗及棘其實一也後人分別杞
棘強生名耳

皇華篇

駟

爾雅云陰白雜毛駟樊光曰駟者目下白也郭璞曰陰
淺黑今之泥驄或云目下白或云白陰俱非也邢昺曰

毛淺黑而白兼雜毛者名駟○埤雅云詩我馬維駒維
騏維駱維駟先後與駟之序合則駟不如駱駱不如騏

常棣篇

常棣

李氏云何彼穠矣言唐棣之華爾雅所謂移也此常棣
與采薇維常之華爾雅所謂棣也○爾雅云常棣棣郭
云今山中有棣樹子如櫻桃可食○陸璣疏云許慎曰
白棣樹也如李而小如櫻桃正白今官園種之又有赤

棣樹葉如刺榆葉而微圓子正赤如郁李而小五月始熟自關西天水隴西多有之○程子曰常棣今所謂玉李花鄂相承甚力○埤雅云華萼上承下覆甚相親爾棣从隶言華萼相承輝榮相棣也

鄂不

箋云承華者曰鄂不當作拊拊鄂足也○楊用修云鄂花苞也今文作萼不華蒂也今文作跗華下有萼萼下有跗花萼相承覆故得韡韡而光明

脊令

爾雅云鴈鵠雉渠郭云雀屬也飛則鳴行則搖○陸璣云大如鸚雀長脚長尾尖喙背上青灰色腹下白頸下黑如連錢故杜陽人謂之連錢○物類相感志云俗呼雪姑其色蒼白如雪鳴則天當大雪○禽經云鵠鵠友悌注鵠鵠共母者飛鳴不相離詩人取以喻兄弟相友之道也○埤雅云詩曰脊令在原脊令水鳥在原則失其所矣其鳴自呼或曰首尾相應飛且鳴者故謂之雉

渠渠之言勤也○詩緝云鵲令雪姑也鄭氏以爲水鳥
非今雪姑非水鳥

朋

公羊傳曰同門曰朋○鄭玄云同師曰朋

飫

毛云飫私也不脫屨升堂謂之飫鄭云私者圖非常之
事若議大疑於堂則有飫禮疏云飫不在公朝在路門
內酒肉在堂○釋言云飫私孫炎曰飫非公朝私飫飲

酒也○國語定王曰王公立飫則有房烝將以講事成
章建大德昭大物也故立成禮烝而已飫以顯物宴以
食好歲飫不倦時宴不淫衛彪傒曰武王克商作詩以
爲飫歌名之曰支以遺後之人使永鑒焉

按皇氏注禮記以飫爲饗禮義異于毛若依韋昭國
語注則毛說爲長但韋依毛鄭爲文未必外傳之本
旨

帑

傳云子也疏云左傳歸其帑書曰子則帑戮女皆是子也

伐木篇

鳥

爾雅云鳥之雌雄不可別者以翼右掩左雄左掩右雌又云二足而羽謂之禽○淮南云羽嘉生飛龍飛龍生鳳皇鳳皇生鸞鳥鸞鳥生庶鳥凡羽者生於庶鳥○白虎通云鳥所以飛何鳥者陽也飄輕所以飛也禽者何

鳥獸之總名明爲人所禽制也○禽經云冠鳥性勇帶
鳥性仁纓鳥性樂風翔則風雨舞則雨霜霏則霜露翫
則露林鳥朝嘲水鳥夜啜山鳥巖棲原鳥地處物食長
喙穀食短喙搏則利觜鳴則引吭毛協四時色合五方
○周禮云庖人供六禽辨其名物射鳥氏掌射鳥羅氏
掌羅鳥鳥掌畜掌養鳥而阜蕃教擾之四時貢鳥物翼
氏掌攻猛鳥庭氏掌射國之妖鳥○禮記云獻鳥者佛
其首畜鳥者則勿佛也○尚書考靈耀云鳥爲春候

神

說文天神引出萬物从示申○易曰陰陽不測之謂神
注神者變化之極妙萬物以爲言不可以形詰○大戴
禮云陽之精氣曰神

按大宗伯之職掌建邦之天神人鬼地示之禮則天
曰神人曰鬼地曰示對文爲異若通而言之則地示
人鬼俱可云神蓋總是精靈之稱耳

辨

爾雅曰未成羊羴郭云俗呼五月羊爲羴○說文云羴
五月生羔也○陸農師云羴从宁宁佇也宁其美成而
後足用○羅氏云說文稱五月生羔似謂仲夏所生按
齊民要術五月六月七月生者兩熱相仍惡中之甚古
稱肥羴以速諸父不應用此當是生及五月者爾

諸父

覲禮曰同姓大國則曰伯父同姓小邦則曰叔父○禮
記曰五官之長曰伯是職方其擯於天子也曰天子之

吏天子同姓謂之伯父九州之長入天子之國曰牧天子同姓謂之叔父注云牧尊于大國之君而謂之叔父避二伯也○服虔左傳注云諸侯稱同姓大夫長曰伯父少曰叔父

陳饋

箋云陳其黍稷謂爲食禮○皇氏注禮記云食禮者有飯有穀雖設酒而不飲其禮以飯爲主故曰食也其禮有二種一是禮食故大行人云諸侯三食之禮有九舉

及公食大夫禮之屬是也二是燕食者謂臣下自與賓客旦夕共食是也按鄭注曲禮酒漿處右云此大夫士與賓客燕食之禮○周禮大宗伯以飲食之禮親宗族兄弟大行人上公食禮九舉侯伯食禮七舉子男食禮五舉掌客上公三食若弗酌則以幣致之侯伯再食子男一食○聘禮公於賓壹食上介壹食若不親食使大夫各以其爵朝服致之以侑幣大夫於賓壹食上介若食若饗○禮記云族食世降一等注云親者稠疏者稀

又云凡養老殷人以食禮○埤雅云饗具四豆四籩之
實食禮則自饋食而下無朝事之豆籩也燕禮則自加
豆加籩而下無饋食之豆籩也

諸舅

聘禮大國異姓則曰伯舅小邦異姓則曰叔舅○禮記
云五官之長曰伯天子異姓謂之伯舅九州之長入天
子之國曰牧天子異姓謂之叔舅○孔仲達云衛孔悝
鼎銘公曰叔舅是諸侯稱大夫舅之文也謂異姓大夫

長者亦當爲伯舅

兄弟

箋云兄弟父母之黨○釋親云男子先生爲兄後生爲弟族父之子相謂爲族舅舅兄之子弟之子相謂爲從父舅舅從母之男子爲從母舅舅弟父之黨爲宗族母與妻之黨爲兄弟婦之黨爲婚兄弟婿之黨爲姻兄弟


餽

爾雅云餽餽食也○說文云餽乾食也○釋名云餽候

也候人飢者以食之也

酤

毛傳云一宿酒也○聽雨紀談云鄭康成訓沽爲權沽之沽毛氏注謂一宿酒曰沽蓋三代無沽酒者至漢武帝時方有權酤似一宿酒爲是



六家詩名物疏卷三十二

欽定四庫全書

經部

六家詩名物疏卷三十三
四

詳校官監察御史_臣沈孫璉

通政使司副使_臣莫瞻菴覆勘

總校官中書_臣朱 鈐

校對官助教_臣黃昌禔

謄錄監生_臣孫國鑑

欽定四庫全書

六家詩名物疏卷三十三

明

馮復京 撰

小雅鹿鳴之什二

天保篇

阜

爾雅云高平曰陸大陸曰阜○釋名云土山曰阜阜厚也言高厚也○風俗通云阜者茂也言平地隆踊不屬于山陵也

陵

爾雅云大阜曰陵○韓詩說云四平曰陵○釋名云陵
隆也體高隆也○易云地險山川丘陵也王公設險以
守其國○春秋說題辭曰陵之爲言稜也輔山成其廣
層稜扶推益厥長也○爾雅云東陵阡南陵息慎西陵
威夷中陵朱滕北陵西隃雁門是也陵莫大於加陵梁
莫大於溴梁墳莫大於河墳謂之八陵

川

釋水云涇闕流川過辨回川○釋名云川穿也穿地而流也○周禮曰川師掌川澤之名川衡掌巡川澤之禁令而平其守祭祀賓客共川奠職方氏揚州其川三江荊州其川江漢豫州其川滎雒青州其川淮泗兗州其川河沛雍州其川涇汭幽州其川河沛冀州其川漳并州其川虜池嘔夷又云兩山之間必有川焉大川之上必有涂焉○禹貢曰濬畝澮距川○蔡邕云衆流注海曰川○國語云川氣之導也

吉

王介甫云吉言諏日擇士之善○周禮太宰祀五帝前期十日帥執事而卜日祀大神亦享先王亦如之○射義云天子將祭必先習射於澤澤者所以擇士也已射於澤而後射於射宮射中者得與於祭不中者不得與於祭○劉氏云諏日者君臣諏謀祭日於旬有一日之先至次日乃卜所諏之日吉否如少牢饋食大夫先與有司諏丁巳之日至明日乃筮其日之吉凶也擇士者

大射於射宮以選與祭之士

蠲

王氏曰蠲言齋戒滌濯之潔○禮記云散齋七日以定之致齋三日以齋之定之之謂齋齋者精明之至也然後可以交於神明也又云七日戒三日齋疏曰七日戒者謂散齋也三日齋者謂致齋也○周禮冢宰祀五帝祀大神亦享先王及執事貤滌濯注執事初爲祭事前祭日之夕滌濯謂溉祭器及甑甗之屬疏儀禮特牲亦

云前祭日之夕視壺濯及豆籩士卑得與人君同少牢
大夫禮當祭日概祭器者下人君也案少牢饗人概鼎
七俎廩人概甑鬩司空概豆籩及勺爵此注不言七俎
豆籩勺爵者之屬中含之又云宰夫祭祀從太牢而眡
滌濯宗伯凡祀大神享大鬼祭大雩帥執事而卜日宿
眡滌濯小宗伯大祭祀眡滌濯肆師祭祀視滌濯

饔

說文饔酒食也或从𩚑或从米○周禮饔人掌凡祭祀

共盛○儀禮主婦視饔饔于西堂下注云炊黍稷曰饔

禴祠烝嘗

爾雅云春祭曰祠夏祭曰禴秋祭曰嘗冬祭曰烝郭璞
曰祠之言食也禴新菜可灼嘗嘗新穀烝進品物○周
禮云以祠春享先王以禴夏享先王以嘗秋享先王以
烝冬享先王司尊彝祠禴裸用雞彝鳥彝朝踐用兩獻
尊再獻用兩象尊嘗烝裸用斚彝黃彝朝獻用兩著尊
饋獻用兩壺尊○王制云天子諸侯宗廟之祭春曰禴

夏曰禘秋曰嘗冬曰烝天子牷禘禘禘禘嘗禘烝諸侯
禘則不禘禘則不嘗嘗則不烝烝則不禘諸侯禘牷禘
一牷一禘嘗禘烝禘注云周改夏祭曰禘以禘爲殷祭
虞夏之制諸侯歲朝廢一時祭郊特牲云饗禘有樂而
食嘗無樂陰陽之義也注云禘當爲禴字之誤記又云
禘者陽之盛也嘗者陰之盛也古者於禘祭爵賜服順
陽義也於嘗出田邑發秋政順陰義也○孔氏云自殷
而上禴禘嘗烝至周公去夏禘之名以春禴當之更名

春曰祠

飲

釋名云飲奄也以口奄而引咽之也○禮記云飲養陽氣也○周禮膳夫王飲用六清食醫掌和王之六飲酒正辨四飲清醫漿酏漿人掌共王之六飲水漿醴涼醫酏凡飲共之○內則飲重醴稻醴清糟黍醴清糟梁醴清糟或以酏爲醴黍酏漿水醢濫

百姓

傳云百姓百官族姓也○虞書平章百姓注云百姓百官○張說云古者民無姓有姓者皆有土有爵者也黃帝之子二十五人得姓者十四而已其後居諸侯之國土者其民以諸侯之姓爲姓居大夫之采地者以大夫之姓爲姓莫可分辨故云皆出自帝王

采薇篇

獫狁

史記曰匈奴其先祖夏后氏之苗裔也曰淳維唐虞以

上有山戎獫狁葷粥居於北蠻逐水草移徙毋城郭常處耕田之業其俗寬則隨畜因獵射禽獸爲生業急則人習攻戰以侵伐其天性也○晉灼云堯時曰葷粥周曰獫狁秦曰匈奴

陽

爾雅云十月爲陽○鄭氏云時坤用事嫌於無陽故以名此月爲陽

戎車

詳見秦小戎

周禮巾車掌王之五路革路以即戎車僕掌戎路之萃
廣車之萃闕車之萃革車之萃輕車之萃注云此五者
皆兵車所設五戎也戎路王在軍所乘廣車橫陣之車
闕車所用補闕之車也革車所用對敵自隱蔽之車也
輕車所用馳敵致師之車也

弭

爾雅云弓有緣者謂之弓無緣者謂之弭孫炎曰緣謂
繳束而漆之弭謂不以繳束骨飾兩頭者也○左傳云

左執鞭弭○鄭氏云弭以助御者解轡紆宜骨也○孔氏云弭者弓梢之名

魚

陸璣疏云魚服魚獸之皮也魚獸似豬東海有之其皮背上斑文腹下純青今以爲弓韃步叉者也其皮雖乾燥以爲弓韃矢服經年海水潮及天將雨其毛皆起水潮還及天晴其毛復如故雖在數千里外可以知海水之潮自相感也○孔氏曰左傳歸夫人魚軒服虔云魚

獸名則魚皮又可飾車

按羅氏以魚服爲鮫魚之皮所爲今鮫魚出南越狀似鼈而無足背文麓錯皮間有珠文可以飾刀有大小二種總謂之沙魚或云其子驚則入母腹雖亦可飾物而先儒說魚服則自以爲魚獸之皮非鮫也

服

釋名云矢其受之器以皮曰箛謂柔服用之也○周禮司弓矢中春獻弓弩中秋獻矢箛及其頌之矢箛皆從

其弓田弋充籠箛矢注云矢箛成於堅以獸皮爲之一
箛百矢籠竹箛也繕人掌王之用矢箛橐人矢八物皆
三等箛亦如之

出車篇

牧

孔氏云牧地在郊載師職曰牧田任遠郊之地是也

天子

易緯云天子者繼天治物改正一統各得其宜父天母

地以養生人至尊之號也○春秋孔演圖云天子皆五
帝精寶各有題序次運相據起必有神靈符紀諸神扶
助使開階立遂○保乾圖云天子之尊也神靈與天地
通血氣含五帝精天愛之子之也○孝經鉤命決云接
上稱天子明以爵事天○說文云古之神聖人母感天
而生子○禮記云天子者與天地參德配天地兼利萬
物與日月並明明照四海而不遺微小其在朝廷則道
神聖禮義之序燕處則聽雅頌之音行步則有環佩之

聲升車則有鸞和之音居處有理進退有度百官得其
宜萬事得其序

僕夫

疏云周禮戎僕掌御戎車御夫掌御從車從車戎路之
副在牧戎車將帥所乘御之則戎僕也下章僕夫况瘁
箋云憂其馬之不正則正御亦在焉

旒

周禮司常云龜蛇爲旒又云及國之大閱贊司馬頒旗

物縣鄙建旒疏云縣鄙是遂之官互約言之鄉之間比遂之鄰同建旒龜蛇象其扞難避害也○夏官大司馬云治兵辨旗物之用郊野載旒注云郊謂鄉遂之州長縣正以下野謂公邑大夫載旒者以其將羨卒也○考工記云龜蛇四旂以象營室也○爾雅云緇廣充幅長尋曰旒○禮記云行前朱雀而後玄武左青龍而右白虎招搖在上急繕其怒○釋名云龜蛇爲旒旒兆也龜知氣兆之吉凶建之於後察度事宜之形兆也

方

尚書曰宅朔方曰幽都○朱傳云今靈夏等州之地○
曹氏云即六月所謂侵鎬及方郡縣志夏州朔方縣什
賁故城在縣治北即漢朔方縣故城也漢武帝收河南
地置朔方五原郡使蘇建築朔方什賁之號蓋蕃語也
○一統志陝西寧夏衛漢朔方郡靈州城在衛城南夏
州城在衛城東○爾雅朔北方也舍人注云朔盡也北
方萬物盡故言朔也

旂

司常云交龍爲旂又云及大閱贊司馬頒旗物諸侯建旂注云諸侯畫交龍一象其升朝一象其下復中車云金路建大旂以賓同姓以封大司馬治兵諸侯載旂考工記云龍旂九旂以象大火也○覲禮云諸侯載龍旂孤羈又云天子載大旂升龍降龍○樂記云龍旂九旒天子之旌也○爾雅云素陞龍於繆練旒九有鈴曰旂○史記云龍旂九旒所以養信也○司馬法云旂夏后

氏玄首人之執也殷白天天之義也周黃地之道也○禮書云天子諸侯之旂龍章一也升龍素降龍青蓋青陽也素陰也陽在上而降陰在下而升交泰之道也先儒以爲王之大常曳地諸侯之旂齊軫卿大夫齊較士齊肩

簡

爾雅云簡謂之畢注今簡札也○說文云簡牒也○蔡邕獨斷曰策者簡也其制長二尺短者半之其次一長

一短兩編下附○孔仲達云簡之所容一行字耳牘乃方版版廣於簡可以並容數行凡爲書字有多有少一行可盡者書之於簡數行乃盡者書之於方方所不容者乃書於策○釋名云簡間也編之篇篇有間也

西戎

朱傳云昆夷也○風俗通云斬伐殺生不得其中戎者兇也○禮記云西方曰戎被髮衣皮有不粒食者矣○爾雅七戎○職方五戎○明堂位六戎○山海經云黃

帝生苗龍苗龍生融吾融吾生弄明弄明生白犬白犬
有牝牡是爲犬戎○書大傳云文王四年伐犬夷注犬
夷昆夷也○帝王世紀云文王受命四年周正月丙子
朔昆夷氏侵周一日三至周之東門文王閉門修德而
不與戰○皇矣串夷載路鄭氏云即混夷西戎國名○
漢匈奴傳周西伯昌伐畎夷注畎夷即畎戎也又曰昆
夷或作混又作緄亦曰犬戎○史記曰自隴以西有緄
戎○後漢西羌傳云武乙暴虐犬戎寇邊周古公踰梁

山而避于岐下及子季歷遂伐西落鬼戎太丁之時季歷復伐燕京之戎戎人大敗周師後二年周人克余無之戎於是太丁命季歷爲牧師自是之後更伐始呼翳徒之戎皆克之及文王爲西伯西有昆夷之患北有獫狁之難遂攘戎狄而戍之莫不賓服乃率西戎征殷之叛國以事紂至厲王無道戎乃入犬丘殺秦仲之族宣王四年使秦仲伐戎爲戎所殺王乃召秦仲子莊公與兵七千人伐戎破之後申侯與戎寇周殺幽王酈山下

秦襄公攻戎救周及平王之末自隴山以東及乎伊洛
往往有戎於是渭首有狄獯邽冀之戎涇北有義渠之
戎洛川有大荔之戎渭北有驪戎伊洛間有楊拒泉皐
之戎潁首以西有蠻氏之戎

按西戎在今鞏昌秦州之地史記稱隴以西有緄戎
蓋隴西者秦州之東也

卉

說文草之總名

魚麗篇

留

爾雅云凡曲者爲留郭注云毛傳曰留曲梁也凡以薄爲魚笱者名爲留又云嫠婦之笱謂之留孫炎曰留曲梁其功易故謂之寡婦之笱○孔氏曰其功易故號寡婦笱非寡婦所作也○周勃傳織薄曲師古云葦薄爲曲也

鱮

陸璣疏云鰭一名黃頰魚似燕頭魚身形厚而長大頰骨正黃魚之大而有力解飛者徐州人謂之揚黃頰通語也○釋文云江東呼黃鰭魚尾微黃大者長七八寸許○埤雅云性浮而善飛躍故一曰揚

鯊

爾雅云鯊鮪注今吹沙小魚體員而有點文○陸璣云魚狹而小常張口吹沙故曰吹沙○異物志曰吹沙長三寸許背上有刺螫人○海物異名記云鯊似鯽而

狹小○廣志云吹沙魚大如指沙中行○埤雅云鯊性
善沈亦於沙中乳子鰭鯴鯉性浮鯊鱧鯉性沈○雅翼
云鯊非特吹沙亦止食細沙味甚美大者不過二斤然
不若小者之佳今人呼爲重脣脣厚特甚有若鼃黿故
名今江東小谿中每春甚多土人珍之夏則隨水下是
後罕矣春來復來大抵正月先至魚之最先至者次則
鯉至次則鰭至桃花水至而鰭肥則三月矣○寧波府
志云皮上有沙故名其類甚多○鳥獸考云鯊有二種

魚麗之藻蓋閩廣江漢之常產海鯊虎頭鯊體黑文鼈足巨者餘二百斤常以春晦陟於海山之麓旬日化爲虎惟四足難化經月乃成矣

鯉

毛傳云鯉鯢也○爾雅云鯉鯢舍人曰鯉一名鯢郭璞曰鯉鯢也鯢今鯉魚似鱖而大○陸璣云鯉鯢也似鯉頰狹而厚○本草鯢魚味甘寒一名鯢魚生九江池澤陶隱居云今皆作鯉字舊言是公螭虵所變然亦有相

生者至難死猶有蛇性日華子云諸魚中惟此膽甘可
食衍義云今人謂之黑鯉魚道家謂頭有星爲厭○爾
雅又云鯉大鯰小者鮓疏此即上文鯉也○埤雅云今
玄鯉是也有舌鱗細有花文一名文魚與蛇通氣其首
戴星夜則向北蓋北方之魚也鱠鯉之美不若魴鯉魴
鯉之美不若鯉鯉故詩序如此○雅翼云鯉魚圓長而
斑點郭氏解釋魚稱爲鮓然今鮓又別一種

按鯉一名鮓此神農本草經也爾雅云鯉魴別二魚

名如云鯉鱸耳舍人陸璣之說非也日華子稱鱧魚
膽味甘陳藏器稱鮠魚膽至苦又云鮠似鯉生江湖
間正合陸璣之說則陸璣所云是鮠非鱧斷乎爲二
物矣羅氏謂鮠別一種又戾本草之說今吳中人知
有鱧不知羅氏所謂鮠復是何物鱧今人指爲厭味
亦不佳鮠即今鰕魚俗不甚珍之

鰕

傳云鰕鮓也○爾雅鰕鮓孫炎曰鰕一名鮓郭璞曰鰕

今偃額白魚鮎別名鯢江東通呼鮎爲鯢○本草云鯢魚味甘主百病陶隱居云此是鯢也即是鮎圖經云大首方口背青黑無鱗多涎又有鰓魚相似而大鮎魚亦相似色黃而美衍義云鯢魚形少類獺有四足腹重墜如囊身微紫色無鱗與鮎鮠相類○埤雅云今鯢額白魚也一名鮎鯢魚偃鯢魚俯鱧魚圓魴魚方○雅翼云鯢魚兩目上陳頭大尾小善登竹有水堰處輒自下騰上或曰口腹俱大者名鰓背青口小者名鮎○梁寅云

鮎腹平著地故得鰻名

按孫炎以鰻鮎爲一魚郭璞以爲二魚未知孰是埤
雅兩從之轉誤後學矣如陶貞白之說鮎即是鰻與
郭說合衍義云鰻魚四足似獺又與鮎大別今吳中
正呼爲鮎不聞謂爲鰻也

六家詩名物疏卷三十三

欽定四庫全書

六家詩名物疏卷三十四 明 馮復京 撰

小雅南有嘉魚之什一

南有嘉魚篇

嘉魚

水經注云襄水又東南得丙水口水上承丙穴穴出嘉魚常以三月出十月入穴口廣五六尺去平地七八尺泉縣注魚自穴下透入水穴口向丙故曰丙穴下注襄

水故左思稱嘉魚出于丙穴○任豫益州記云嘉魚似
鱒蜀中謂之拙魚蜀郡山處處有之從石孔出大者五
六尺○雲南記云雅州丙穴出嘉魚似鯉鱗細○嶺表
錄異云嘉魚形如鱒出梧州戎城縣江水口甚肥美最
宜爲鯪每炙以芭蕉葉隔火蓋慮脂滴火滅耳○本草
嘉魚味甘溫食之令人肥健悅澤此乳穴中小魚常食
乳水所以益人○方輿勝覽云首有黑點謂照映星象
相感而成長身細鱗肉白如玉其味自鹹○虞衡志云

嘉魚出梧火山下丙穴如小鮓魚多脂煎不假油蜀中
丙穴亦出肥美相似○埤雅云鯉質鱗鱗肌肉甚美食
乳泉出于丙穴先儒言丙穴在漢中沔南縣北有乳穴
二常以三月取之

按嘉魚所產地不一大都蜀與南越之境也然皆云
出自丙穴豈因嘉魚所出而通得此名耶若水經注
所云丙穴則在今陝西漢中府沔縣境

罩

爾雅云簾謂之罩李巡曰簾編細竹以爲罩捕魚也孫炎曰今楚簾也○孔仲達曰罩以竹爲之無竹則以荆故謂之楚簾○陸佃云魚欲逸則罩之使入

汕

爾雅云罩謂之汕郭璞曰今之撩罟○朱傳云以薄汕魚也○陸氏云魚欲伏則汕之使出

南山有臺篇

臺

爾雅云臺夫須○陸璣云舊說夫須莎草也可爲簑笠
故曰臺笠緇撮或云臺草有皮堅細滑緻可爲簑笠南
山多有○纂文曰臺一名山莎○本草香附子即莎草
根生田野二月八月採圖經云香附子交州者大如棗
近道者如杏仁苗莖葉都似三稜根若附子周帀多毛
今近道生者苗葉如薤而瘦根如筍頭大○埤雅云莎
草疏而無溫故从沙

菜

陸璣云萊草名其葉可食今兗州人烝以爲茹謂之萊烝

杞

陸璣云杞一名狗骨山材也其樹如樗理白而滑可以爲函及檢板其子爲木蠹可合藥○曹氏云梓杞也

枸

陸璣云枸枳枸也木高大似白楊所在山中皆有枝柯不直子著枝端大如指長數寸噉之甘美如飴八九月

熟江南特美今官園種之謂之木蜜本從南方來能敗酒若以爲屋柱則一屋之酒皆薄○本草云枳椇味甘平一名木蜜其木皮溫唐本注云其樹徑尺葉如桑柘其子作房似珊瑚核在其端人皆食之○古今注云枳椇子一名樹蜜一名木錫實形拳曲核在實外亦名白石白實木石木實○廣志云葉似蒲柳子十一月熟樹乾者益美○埤雅云多枝而曲飛鳥喜巢其上賦曰枳椇來巢是也○雅翼云古者人君燕食所加庶羞凡三

十一物其果則有菠稊棗栗榛柿瓜桃李梅杏楂梨又婦人之贄稊榛棗栗荆楚之俗亦鹽藏苡裹以爲冬儲今不以爲重賤者食之而已

楸

爾雅云楸鼠梓郭璞曰楸屬也今江東有虎梓○陸璣云其樹葉木理如楸山楸之異者今人謂之苦楸○曹氏云宮室之良材

蓼蕭篇

倅革

傳云倅轡也革轡首也○爾雅云轡首謂之革○孔仲達云馬轡所鞮之外有餘而垂者謂之革倅皮爲之故云倅革

和 詳見秦風鸞

魯詩訓曰和設軾者也鸞設衡者也○韓詩說曰在軾曰和在軛曰鸞○毛傳云在軾曰和在鑣曰鸞○干寶周禮注云和鸞皆以金爲鈴鸞者在衡和在軾馬動

則鸞鳴鸞鳴則和應舒則不鳴疾則失音故詩云和鸞
雍雍言得其和也○孔仲達云和亦鈴也以其與鸞相
應和故載見曰和鈴央央是也○埤雅云青鳳爲鸞鸞
雌曰和後世作和鸞以象之

湛露篇

夜飲

箋云夜飲之禮在宗室同姓諸侯則成之庶姓讓之則
止○燕禮無算爵無算樂宵則庶子執燭于阼階上司

官執燭于西階上甸人執大燭于庭閤人爲大燭于門外賓醉奏陔遂出

宗

詳見斯干

傳云夜飲必于宗室○朱傳云蓋路寢之屬○詩緝燕禮云膳宰具官饌于寢東注云寢路寢也當從朱氏

彤弓篇

彤弓

傳云朱弓也以講德習射○左傳甯武子云諸侯敵王

所愾而獻其功王於是乎賜之彤弓一彤矢百旅弓矢千以覺報宴○禮記云諸侯賜弓矢然後專征伐○孔疏云弓皆漆之以禦霜露彤弓周禮當唐弓大弓往體來體若一合七成規彤矢當周禮恒矢也色以赤者周之所尚

饗

周禮大行人云上公饗禮九獻侯伯七獻子男五獻大國之孤視小國之君掌客云上公三饗侯伯再饗子男

一饗○聘禮云公於賓再饗賓介皆明日拜於朝上介
一饗大夫於賓一饗上介若食若饗○禮記云凡養老
有虞氏以燕禮夏后氏以饗禮殷人以食禮周人修而
兼用之○仲尼燕居云禮有九焉大饗有四焉兩君相
見揖讓而入門入門而縣興揖讓而升堂升堂而樂闋
下管象武夏籥序興陳其薦俎序其禮樂備其百官行
中規還中矩和鸞中采齊客出以雍徹以振羽○左傳
云饗有體薦燕有折俎公當饗卿當燕王室之禮也又

云享以訓共儉燕以示慈惠○皇氏禮記注云饗有四種一是諸侯來朝天子饗之其牲則體薦體薦則房烝國語云王公立飫則有房烝其所云飫即謂饗也其禮亦有飯食故春人云凡饗食共其食米則饗禮兼燕與食也二是王親戚及諸侯之臣來聘王饗之禮亦有飲食及酒其酌數亦當依命其牲折俎亦曰殽烝三是戎狄之君使來王委饗之四是饗宿衛及耆老孤子則以醉爲度○儀禮疏云受賓聘享則於太廟饗食則于禰

廟燕又在寢彌相親也周禮疏云饗禮九獻者謂後日王速賓賓來就廟中行饗饗者烹大牢以飲賓設几而不倚爵盈而不飲九獻者王酌獻賓賓酢主人主人酬賓酬後更八獻是爲九獻

右

傳云右勸也疏云謂設享禮勸其功○箋云右之者主人獻之賓受爵奠于薦右既祭俎乃席末坐卒爵之謂也○詩緝云右與宥侑通皆助也莊十八年左傳云王

饗禮命之宥注以幣物助歡也僖二十五年二十八年皆云饗醴命宥是饗禮必有賜以爲宥而彤弓則宥之大者也

壽
酉

傳云壽報也疏云爲享以報功○箋云主人獻賓賓酢主人主人又飲而酌賓謂之酬○孔氏云酬有二等既酢而酬賓者賓奠之不舉謂之奠酬至三爵之後乃舉向者所奠之爵以行之於後交錯相酬名曰旅酬謂衆

相酬也

按嚴坦叔云鄭以酬爲獻壽但酬酢是燕禮饗訓共
儉爵盈不飲未必有酬酢此考之不詳也周禮掌客
饗有九獻七獻五獻之節郊特牲云大饗君三重席
而酢三獻之介君專席而酢但其禮之儉不若燕之
四舉旅耳安得謂無酬酢耶

菁莪篇

莪

爾雅云莧蘿○陸璣云莧蒿也生澤田漸洳之處葉似
邪蒿而細科生三月中莖可生食又可炰香美味頗似
萋蒿○廣志云莧蒿廩蒿○本草唐注云葉似白蒿花
如瞿麥紅赤可愛子似王不留行黑色作角七月八月
採蜀本圖經云葉似蛇床青蒿等子角似蔓青實黑秋
熟所在皆有之陳藏器云廩蒿生高岡宿根先于百草
衍義云角蒿莖葉如青蒿開淡紅紫花花大約徑三四
分花罷結子長二寸許微彎

按莪蒿一名角蒿一名蘼蒿陸璣以爲生澤田陳藏器以爲生高岡其說之不同若此以詩文証之陵阿則高地也汙則水中也然則澤田高岡俱有莪矣

百朋

箋云古者貨貝五貝爲朋疏云漢書食貨志有五種之貝貝中以相與爲朋非總五貝爲一朋也○食貨志云王莽居攝更作龜貝錢布之品大貝四寸八分以上二枚爲一朋直二百一十六壯貝三寸六分以上二枚爲

一朋直五十幺貝二寸四分以上二枚爲一朋直三十小貝寸二分以上二枚爲一朋直十不盈寸二分漏度不得爲朋率枚直錢三是爲貝貨五品

六月篇

常

傳云日月爲常○周禮司常日月爲常巾車王乘玉路建太常十有二旂以祀大司馬教治兵王載太常司勳凡有功者銘書于王之太常○覲禮天子乘龍載大旂

象日月升龍降龍○郊特牲云旂十有二旒龍章而設
日月象天也○鄭氏云春夏之田用大麾秋冬建太常
王之自將建太常不自將建太白○禮書云常有三辰
升龍降龍設崇牙備弧矢

弧以張繆也鄭氏謂崇牙者爲重牙以飾旒之側

飾

之以旒垂之以鈴考工記曰弧旌枉矢以象弧明堂位
曰乘大輅載弧韉左傳曰錫鸞和鈴爾雅曰有鈴曰旂
則太常之制可知已太常不特祀天至于拜日拜月祀
方明禮四瀆禮山川秋治兵冬大閱皆載焉然常之三

辰則北斗而已與衣服畫星辰不全觀曲禮曰招搖在上穆天子傳曰天子葬盛姬建日月七星蓋旗以指物所畫不過北斗耳

焦穫

爾雅十藪周有焦穫孫炎曰岐周也郭璞曰今扶風池陽縣瓠中是也○寰宇記焦穫藪在京兆府涇陽縣北十數里亦名瓠口○溝洫志云韓水入鄭國說秦令鑿涇水自中山西抵瓠口爲渠○朱傳云焦未詳所在穫

郭璞以爲瓠中今在耀州三原縣○一統志焦穫澤在陝西西安府涇陽縣西北亦名瓠口蓋古之焦穫數也池陽廢縣在三原縣東北二十里漢時遺址畧存

鎬方

鄭氏云鎬也方也皆北方地名○王基云劉向曰千里之鎬猶以爲遠鎬去京師千里○朱傳云劉向以爲千里之鎬則非鎬京之鎬矣未詳所在方疑即是朔方也

涇陽

箋云涇水之北疏云水北曰陽涇去京師爲近○通典云今涇原州地並涇水之陽○一統志涇陽在西安府城北七十里故城在平涼府界以居涇水之北故名

織文

箋云織徽織也將帥以下衣皆著焉疏云言徽織者以其在軍爲徽號之織織與幟字同以絳爲縵畫爲鳥隼又絳爲旒書名於末其制如所建旌旗而畫之著之于衣自王以下旌旒雖有等差其徽織同長三尺縵長一

尺旂長二尺○周禮司常掌九旗之物名各有屬以待
國事日月爲常交龍爲旂通帛爲旛雜帛爲物熊虎爲
旗烏隼爲旗龜蛇爲旐全羽爲旛析羽爲旂及大閱官
府各象其事州里各象其名家各象其號注云物名者
所畫異物則異名也屬謂徽織也大傳謂之徽號事名
號三者旂旗之細也士喪禮爲銘各以其物亡則以緇
長半幅頰末長終幅廣三寸書名於末大閱禮象而爲
之兵凶事若有死事者亦當以相別也○大司馬教茆

舍辨號名之用帥以門名縣鄙各以其名家以號名鄉以州名野以邑名百家各象其事○呂東萊云日月爲常之類皆幟之文也鳥章特其一爾詩之所指乃其建之旗鄭氏所箋乃所服之號初非一物

白

孔氏曰白謂絳帛○尚書曰舜修三帛○周禮染人掌染帛肆師大祀用玉帛典命諸侯之適子未誓以皮帛繼子男閭師民不蠶者不帛職方氏并州其利布帛帛

氏練帛○坊記云禮之先幣帛也欲民之先事而後祿
○易曰賁于丘園束帛戔戔○說文帛繒也

白旆

毛傳云白旆繼旒者也疏云此旗而言旆者散則通名
九旗之帛皆用絳言白旆者謂絳帛猶通帛爲旗亦是
絳也○爾雅云緇廣充幅長尋曰旆繼旆曰旆注云帛
續旆末爲燕尾者○曹氏曰白旆以帛續旆末爲燕尾
戰則旆之

按繼旒曰旒出于爾雅郭注所云續旒末爲燕尾義見詩者即此白旒央央也然則旒是旂身旒是旂尾考之詩圖則一車中有二旗其一旗畫朱鳥即織文鳥章其一則旒別自爲一竿有旒有兩飄帶其所謂緇廣充幅長尋與燕尾之形並無有焉詩圖出于後儒固不足信不可據以疑爾雅然此詩下文云元戎十乘以先啓行則旒蓋建于元戎之上者元戎軍之前行几師前朱雀而後玄武恐不得建旒也鄭氏以

織爲著之于衣故孔氏解毛傳繼旒曰旒以爲旗旒散則通名此說經傳無文毛意當是據爾雅不得與鄭同也左傳說旒多矣杜氏注各不同莊二十八年子元闕御強闕梧耿之不比爲旒注云子元自與二子特建以居前廣充幅長尋曰旒繼旒曰旒僖二十八年狐毛設二旒而退之注云旒大旗也建二旒而退若使大將稍卻又亡大旒之左旒注云大旒旗名繫旒曰旒通帛曰旗宣十二年令尹南轅反旒注云

迴車南向旆軍前大旂昭十三年合諸侯于平丘八月辛未治兵建而不旆壬申復旆之注云建立旌旗不曳其旆旆游也軍將戰則旆故曳旆以恐之哀二年陽虎以兵車之旆與罕駟兵車先陳注云旆先驅車也傅士凱反復其說以事推之知子元之旆陽虎之旆軍前大旂也狐毛所設與亡大旆之旆建而不旆之旆大將所建大旗也所云建者旂之竿耳如傅氏之說則此白旆央央者即軍前大旂故建於元戎

之上孔氏亦云軍行之次旆最在先是也若是繼旆
之旆乃後軍所建矣旆之末不妨有旆顧非此旆耳
至杜以旆爲旂尤是臆說旂如垂水之勢數之多寡
不同非燕尾之形也若杜此注不從爾雅則旌旂既
建但結其旂旗是大物既已建矣反以旂之舒結爲
戰不戰之候晉之軍容何太不彰明乎

元戎

司馬法云夏后氏曰鈎車殷曰寅車周曰元戎○毛氏

云元大也鈎車先正也寅車先疾也元戎先良也○韓詩說云元戎大戎謂兵車也車有大戎十乘以謂車縵輪馬被甲衡扼之上盡有劒戟名曰陷軍之車所以冒突衝啓敵家之行伍也○王介甫云軍前曰啓後曰殿元戎十乘以先軍行之前者所謂選鋒也兵法軍無選鋒曰北

太原

書禹貢既修太原顏師古曰即今晉陽○黃氏云晉太

原大鹵大夏夏虛晉陽凡六名○朱傳云太原亦曰大鹵今在大原陽曲縣○穀梁傳云中國曰太原夷狄曰大鹵○後漢西羌傳穆王遷戎于大原夷王命虢公率六師伐大原之戎至于俞泉宣王遣兵伐大原戎不克○大全注太原即今太原府陽曲縣隸山西

鼈

周禮鼈人掌取互物

有甲物

以時簎魚鼈龜蜃凡貍

含刀之屬

物春獻鼈鼈蜃秋獻龜魚禮記云水潦降不獻魚鼈又

云水煩則魚鼈不大又云居山以魚鼈爲禮君子謂之不知禮又云鼈去醜○淮南子云鼈無耳而目不可以瞽精於明也○博物志云九竅者胎化八竅者卵生龜鼈鼃此諸類皆卵生而影伏○古今注云鼈一名河伯從事○埤雅云鼈以眼聽穹脊連脅甲蟲也水居陸生養魚經曰魚滿三百六十則龍爲之長引飛出水內鼈則魚不復去故鼈一名神守天地之性細腰純雄大腰純雌大腰龜鼈之屬以虵爲雄段成式云甲蟲影伏羽

蟲體伏今鼈伏于淵而卵剖于陵此思化也內典曰鶴
影生鼈思生是則思生與影伏異矣○雅翼云易離爲
鼈爲蟹爲龜以其骨在外肉在內也至考工記則以外
骨爲龜屬內骨爲鼈屬以鼈外有肉緣比龜爲內骨耳
鼈鼈之大者濶或至一二丈

膾

釋名云膾會也細切肉令散分其赤白異切之已乃會
合和之也○禮記云進食之禮膾炙處外又云牛膾羊

炙魚膾芥醬大夫燕食有膾無脯有脯無膾膾春用葱
秋用芥肉腥細者爲膾大者爲軒又云牛與羊魚之腥
聶而切之爲膾麋鹿爲菹野豕爲軒皆聶而不切麋爲
辟雞兔爲宛脾皆聶而切之切葱若薤實之醢以柔之
陳氏云聶而切之者謂先聶爲大臠而後報切之爲膾
也

六家詩名物疏卷三十四

欽定四庫全書

經部

六家詩名物疏卷三十五

六

詳校官監察御史_臣沈孫璉

通政使司副使_臣莫瞻菴覆勘

總校官中書_臣朱 鈐

校對官助教_臣黃昌祺

謄錄監生_臣孫國鑑

欽定四庫全書

六家詩名物疏卷三十五 明 馮復京 撰

小雅南有嘉魚之什二

采芑篇

芑

陸疏云芑菜似苦菜莖青白色摘其葉白汁出肥可生食亦可炆爲茹西河雁門芑尤美胡人戀之不出塞是也○朱傳云即今苦蕒菜宜馬食軍行采之人馬皆可

食也○本草云野苦蕒五六回拗後味甘滑于家苦蕒

新田

爾雅云二歲曰新田孫炎曰新田新成柔田也

菑

爾雅云田一歲曰菑孫炎曰菑始菑殺其草木也郭璞曰今江東呼初耕地反草爲菑○孔仲達云菑是殺草之名雖二歲之後耕而殺草亦名爲菑

鉤膺

朱傳云鈎膺馬婁領有鈎而在膺有樊有膺也樊馬大帶纓鞅也○疏云此鈎是金路或方叔爲同姓或五官之長得乘金路矣不乘革路者以革路臨戰所乘此時受命率車未至戰時故不言戎車也○周禮巾車玉路錫樊纓十有再就金路鈎樊纓九就象路朱樊纓七就革路龍勒條纓五就木路前樊鵠纓注云樊讀如鞞帶之鞞謂今馬大帶也鄭司農云纓謂當胸以削革爲之玄謂纓今馬鞅玉路之樊及纓皆以五采屬飾之十二

就就成也鉤婁領之鉤也金路無錫有鉤亦以金爲之
其樊及纓以五采罽飾之而九成象路無鉤以朱飾勒
而已其樊及纓以五采罽飾之而七成革路以白黑韋
襍色爲勒條讀爲條其樊及纓以條絲飾之而五成木
路無龍勒以淺黑飾韋爲樊鵠色飾爲纓前讀爲翦淺
黑色也就數與革路同○大行人云上公樊纓九就侯
伯七就子男五就○既夕云薦馬纓三就注諸侯之臣
飾纓以三色而三成此三色者蓋條絲也○禮記云大

路樊纓一就次路樊纓七就注大路殷祭天之車也又云大路樊纓一就先路三就次路五就○左傳鞶厲游纓昭其數也注纓在馬胸前如索羣○釋言云羣屬也舍人曰羣毛也屬胡人續羊毛而作○禮書云鉤在膺前以金爲之杜預曰纓在馬膺前如索羣則纓非鞶也樊然爲鞶之飾耳巾車言五者之飾皆其首面頤膺之著者也故不及腹帶鄭康成以樊爲鞶帶之鞶又以龍爲羆條爲條前爲剪非也纓蓋用組爲之與冠纓同五

采一匝爲就與圭纁冕旒之就同

中鄉

鄭氏云中鄉美地名

軹

詳見秦風轂

說文曰軹長轂也○考工記云容轂必直陳篆必正注云容者治轂爲之形容也篆轂約也蓋以皮纏之而上加以朱漆也○詩詁云軹轂之旁出者也

衡

釋名云衡橫也橫馬頸上也○考工記輿人爲車輪崇車廣衡長參如一謂之參稱輶人爲輶衡任者五分其長以其一爲之圍注云衡任謂兩軛之間也○烈祖箋云金飾錯衡之車○禮書云衡長六尺六寸衡任之圍一尺三寸五分寸之一而其長與輪崇車廣等衡圍與軸圍等矣說文謂輶耑持衡曰軛軛下曲曰軻軻軻曰輶左傳稱庾公差追衛獻公射兩軻而還則軻在輶端衡在軻上軻軻輶在衡下而軻與軻輶一物也衡上有

采以爲飾詩曰錯衡是也軛上有環以貫轡爾雅曰載轡謂之轆是也

命服

箋云命服者命爲將受王命之服也天子之服韋弁服朱衣裳疏云經云朱芾芾從裳色故知裳亦朱不用戎服素裳者以其命將非在軍不可純如之也亦變爲美故襍祭服之飾

蔥珩

朱傳云玼佩首橫玉也○玉藻云一命緼黼幽衡再命
赤黼幽衡三命赤黼葱珩注云衡佩玉之衡也幽讀爲
黜黑謂之黜青謂之葱周禮公侯伯之卿三命其大夫
再命其士一命子男之卿再命其大夫一命其士不命
○孔氏曰玉藻累一命至三命而止而云葱珩則三命
而上至九命皆葱珩也○雅翼云葱本白而末青青色
尤美古者佩玉有葱珩以玉色如葱色得名

隼

爾雅云鷹隼醜其飛也。翬郭云鼓翅翬翬然疾。○陸璣云隼鶚屬也。齊人謂之擊征。或謂題肩。或謂雀鷹。春化爲布穀者是也。○考異郵云陰陽氣貪故題肩。擊宗均云題肩有爪芒爲陰中陽故擊殺也。○禽經云鳥之小而鷙者皆曰隼。大而鷙者皆曰鵟。又云鷹好峙。隼好翔。鷹以膺之。鶚以搯之。隼以尹之。○法言云麟之儀儀鳳之師師。其至矣乎。螭虎桓桓。鷹隼戢戢。未至也。○化書云烏反哺仁也。隼憫胎義也。○韋昭云隼今之鶚。○李

善云鷩擊之鳥通呼曰隼○陸佃云隼于文从水从隹
今鷹之搏噬不能無失獨隼爲有準每發必中或曰即
今所呼爲鷩者是○雅翼云古今言隼未有的指其物
者獨說文解隼云祝鳩也思允切又去鳥从十作隼則
隼與隹通凡詩之翩翩者隼皆隼也又解淮南子烏力
勝日而服于隼禮引爾雅謂之鷩鷩鷩時鳴人呵舍者
鴻鳥皆畏之據許所說則今鷩鷩鷩鷩小于烏而逐烏
郭氏解鷩鷩亦云小黑鳥鳴自呼江東名爲烏鷩解詩

離者類引釋鳥佳其鵠鳩故遂以爲祝鳩按佳字音錐此既从鳥自與隹通事不相與獨鷁鳩鵠鷁者是矣

鉦

說文云鉦鐃也鐃小鉦也似鈴柄中上下通鐃也○孔氏云鐃鐃俱得名鉦但鐃以節鼓非靜之義故知鉦以靜之指謂鐃也凡軍進退皆鼓動鉦止非臨陳獨然依文在陳師鞠旅之上是未戰時事○周禮鼓人以金鐃節鼓以金鐃止鼓注云鐃鉦也形如小鐘軍行鳴之

以爲鼓節鐃如鈴無舌有秉執而鳴之以止擊鼓大司
馬職云中春教振旅辨鼓鐸鐃之用卒長執鐃公司
馬執鐃以教坐作進退疾徐疏數之節中冬教大閱車
徒皆作鼓行鳴鐃行及表乃止又三鼓車徒皆作鼓進
鳴鐃車驟徒趨及表乃止坐作如初乃鼓車馳徒走及
表乃止鼓戒三闕車三發徒三刺乃鼓退鳴鐃且卻及
表乃止坐作如初○樂記曰今夫古樂始奏以文復亂
以武疏云武謂金鐃○樂書云國語曰鼓丁寧韋昭曰

丁寧鉦也蓋自其聲濁言之謂之鐃自其徹人言之謂之丁寧自其正人言之謂之鉦周禮卒長執鐃以其聲饒饒然故以鐃名漢鼓吹曲有鐃歌所以退武舞也豈亦周之遺制與

旅

周禮云五百人爲旅旅帥皆下大夫

振旅

爾雅云出爲治兵尚威武也入爲振旅反尊卑也孫炎

曰出則幼賤在前貴勇力也入則尊老在前復常法也
○左傳云三年而治兵入而振旅○穀梁傳云出曰治
兵習戰也入曰振旅習戰也○公羊傳云出曰祠兵入
曰振旅其禮一也皆習戰也○周禮中春教振旅

蠻

尚書三百里蠻注云以文德蠻來之不制以法○風俗
通云君臣同川而浴極爲簡慢蠻者慢也○爾雅六蠻
李巡曰一曰天竺二曰咳首三曰隳僥四曰跂踵五曰

穿胸六曰僇耳七曰狗軹八曰旁脊○王制曰南方曰蠻雕題漆齒有不火食者矣○周禮職方氏掌八蠻之人○明堂位八蠻之國○後漢傳平王東遷蠻侵暴中國潁首以西有蠻氏之戎○留青日札云南方之人曰蠻从虫緇聲蛇種也

荆

元命包云軫星散爲荊州分爲楚國荆之言強也陽盛物堅其氣急悍也○尚書禹貢云荆及衡陽惟荊州孔

氏云北據荆山南及衡山之陽○爾雅漢南曰荊州○
釋名云荊州取名于荊山也荊警也南蠻數爲寇逆其
民有道後服無道先强警備之也○國語史伯曰當成
周者南有荊蠻荊子熊嚴生子四人叔逃難于濮而蠻
蠻芊蠻矣惟荊實有令德○晉語叔向云昔成王盟諸
侯于岐陽楚爲荊蠻置茅絕設望表與鮮牟守燎故不
與盟○穀梁傳云荊者楚也何爲謂之荊狄之也何爲
狄之聖人立必後至天子弱必先叛故曰荊狄之也○

史記楚世家熊霜元年周宣王初立又曰荆楚僇勇輕悍好作亂乃自古記之矣

元老

禮記云五官之長出于諸侯曰天子之老

霆

爾雅疾雷爲霆霓注雷之急擊者謂霹靂○說文云霆雷餘聲也鈴鈴所以挺出萬物震劈歷振物者春秋傳曰震夷伯之廟○五經通義云震與霆比曰霹靂也○春

秋繁露云王言下不從則金不從革而秋多霹靂霹靂者金氣其音商故應霹靂○莊子云陰陽錯行則天地大絃於是乎有雷有霆

征伐

孟子曰征者上伐下也敵國不相征也又云征者正也各欲正已也○周禮大司馬以九伐之法正邦國馮弱犯寡則眚之賊賢害民則伐之暴內凌外則壇之野荒民散則削之負固不服則侵之賊殺其親則正之放弑

其君則殘之犯令凌政則杜之外內亂鳥獸行則滅之
○春秋左傳云有鐘鼓曰伐無曰侵○公羊傳云捕者
曰侵精者曰伐○穀梁傳云邕人民毆牛馬曰侵斬樹
木壞宮室曰伐

車攻篇

東 互見國風王

傳云東洛邑也○周書度邑解武王曰我南望過于三
塗我北望過于有嶽不願瞻過于河宛瞻于伊洛無遠

天室其曰茲曰度邑作維解云周公將致政乃作大邑
成周于土中城方千七百二十丈郭方十七里南繫于
洛水北因于邠山以爲天下之大湊制郊甸方六百里
國西土爲方千里○史記婁敬云成王即位而營成周
洛邑以此爲天下之中也有德則易以王無德則易以
亡○通鑑外紀云成王使召公先相宅周公至洛師復
卜申視營築謂之王城是爲東都○東京賦云召伯相
宅卜惟洛食周公初基其繩則直汭洛背河左伊右瀍

西阻九河東門於旋太室作鎮揭以熊耳底柱輟流鐔
以大岨○陸機洛陽記云洛陽城周公所制東西十里
南北十三里城上百步有一樓櫓外有溝渠○一統志
河南河南府禹貢豫州之域武王定鼎郊鄘成王營洛
爲王城下都平王東遷乃居王城洛陽縣附郭本成周
地居洛水之北故曰洛陽洛陽故城在府城東洛水北
周公所營成周也

田車

季彭山云田車在周禮巾車謂之木路不輓以革而但漆之蓋樸素渾堅之制也輿廣六尺六寸與兵車乘車同惟輪則田車小兵車乘車三寸說者以兵車乘車皆駕國馬而田車駕田馬故也然既差馬而齊之故四牡孔阜皆良馬也特以田車欲便于搏獸故其輪稍低所謂田馬雖不及龍馬之八尺蓋亦七尺之駉矣

莆草

鄭箋云莆田之草也○爾雅十藪鄭有圃田郭云今滎

陽中年縣西圃田澤是也○職方云河南曰豫州其澤數曰圃田○穆天子傳天子里甫田之路東至于房○左傳皇武子曰鄭之有原圃猶秦之有具圃○竹書紀年梁惠成王十年入河水于甫田又爲大溝而引甫水○水經注云渠水歷中年縣之圃田澤澤多麻黃草故述征記曰踐縣逕便覩斯卉窮則知踰界詩所謂東有圃草也西限長城東極官渡北佩渠水東西四十許里南北二百許里中有沙岡上下二十四浦津津流逕通

淵潭相接水盛則北注渠溢則南播爲鄭隰之淵數矣
○一統志圃田澤在河南開封府中牟縣西北七里其
澤東西五十里南北二十六里西限長城東極官渡高
者可耕窪者成滙今爲澤者八若東澤西澤之類爲陂
者三十有六若大灰小灰之類其實一圃田澤耳

苗

傳云夏獵曰苗○爾雅夏獵爲苗郭璞曰爲苗稼除害
○周禮中夏教芟舍如振旅之陳辨號名之用遂以苗

田注云夏田爲苗擇取不孕任者若治苗去不秀實者
○公羊傳云春曰苗

獸

說文云獸守備者也○國語云獸三爲羣○爾雅云四
足而毛謂之獸○周禮庖人掌共六獸鄭司農云麋鹿
熊麕野豕兔玄謂六獸當有狼而熊不屬又獸人掌罟
田獸獸醫掌療獸病療獸瘍服不氏掌養猛獸而教擾
之穴氏掌攻螫獸囿人掌囿游之獸禁○淮南子曰毛

犢生應龍應龍生建馬建馬生麒麟麒麟生庶獸凡毛者生于庶獸

敖

箋云敖鄭地今近滎陽○郡縣志敖山在鄭州滎澤縣西十五里○水經濟水東逕敖山北注云詩薄獸于敖山上有城殷仲丁所遷秦置倉于其中亦曰敖倉城○呂東萊云晉師救鄭在敖鄆之間設七覆於敖前則敖山之下平曠可以屯兵翳薈可以設伏東有甫草即此

地○郡國志河南滎陽有教亭周宣王狩于敖○一統志敖山在河南開封府鄭州河陰縣西北二十里

金鷄

箋云金鷄黃朱色也疏即禮之赤鷄也加金爲飾故謂金鷄

會

互見汚水

儀禮云諸侯覲于天子爲宮方三百步四門壇十有二尋深四尺加方明于其上注此謂時會殷同也爲宮者

於國外王巡狩至方嶽諸侯會之亦爲此宮以見之又
云公侯伯子男皆就其旂而立四傳擯天子出拜日于
東門之外反視方明禮日于南門外禮月與四瀆于北
門外禮山川丘陵于西門外祭天燔柴祭山丘陵升祭
川沈祭地瘞○周禮大宗伯以賓禮親邦國時見曰會
注云時見者言無常期諸侯有不順服者王將有征討
之事則既朝覲王爲壇於國外合諸侯而命事焉春秋
傳曰有事而會不協而盟是也大司馬大會同帥士庶

子而掌其政令小司馬凡小會同掌其事大行人時會以發四方之禁注云禁謂九伐之法司儀將合諸侯則令爲壇三成宮旁一門詔王儀南鄉見諸侯土揖庶姓時揖異姓天揖同姓○少儀云會同主詔○晉叔向云明王之制歲聘以志業間朝以講禮再朝而會以示威再會而盟以顯昭明

同

周禮大宗伯云殷見曰同注殷猶衆也十二歲王如不

巡狩則六服盡朝朝禮既畢王亦爲壇合諸侯以命政
焉所命之政如王巡狩殷見四方四時分來終歲則徧
大行人云殷同以施天下之政注政謂邦國之九法

按毛傳時見曰會殷見曰同此釋文則然耳其實宣
王會諸侯於東都非必有征討又非十二年之事意
者會諸侯之時亦曾爲壇于國外如覲禮所云與然
會者交會同者同聚則諸侯見天子或並得稱之乎

拾

三禮圖云撻者臂捍以朱韋爲之謂之撻者所以遂弦也○周禮繕人掌王之用決拾注拾謂韝扞也著左臂裏以韋爲之○禮書云拾亦謂之遂儀禮所謂袒決遂是也亦謂之捍內則所謂佩決捍是也鄉射記大夫與士射袒纁襦燕禮記君射袒朱襦蓋大夫與士射士則以拾蔽膚大夫斂衣而已君與大夫射大夫以拾蔽膚君斂衣而已鄭氏謂拾所以蔽膚斂衣者此也曲禮曰野外軍中無摯以纓拾矢可也則拾亦可以爲摯與

射夫

孔氏云大射禮選羣臣爲三耦若大夫不足以士充之
三耦之外其餘衆士與射者各自取匹謂之衆耦射人
說賓射之禮云王以六耦則天子大射亦六耦也故夏
官大司馬職云若大射則合諸侯之六耦此其義也射
人云諸侯四耦大射惟三耦者賓射對鄰國之君尊故
四耦大射與已之臣子卑故降之天子尊無與敵無所
差降大射賓射六耦之外亦當有衆耦

徒

爾雅云徒御不驚輦者也○傳云徒輦也○周禮鄉師云大軍旅會同治其輦注云輦人輓行所以載任器也止以爲蕃營族師以時校登族之車輦縣師辨車輦之稽遂人遂師掌以時登其車輦稍人若有會同師田行役之事則以縣師之法作其輦輦○司馬法曰夏后氏謂輦曰余車殷曰胡奴車周曰輜輦輦一斧一斤一鑿一裡周輦加二板二築夏后氏二十人而輦殷十八人

而輦周十五人而輦

庖

周禮庖人掌共六畜六獸六禽辨其名物凡其死生魚鱉
鼈之物以共王之膳與其薦羞之物及后世子之膳羞
共祭祀之好羞共喪紀之庶羞賓客之禽獻鄭玄云庖
之言苞也裹肉曰苞苴○禮記曰君子遠庖厨凡有血
氣之物弗身踐也又曰獵之禮一爲乾豆二爲賓客三
爲充君之庖○帝王世紀云太昊取犧牲以共庖厨

吉日篇

戊

爾雅云太歲在戊曰著雍○說文云戊中宮也象六甲五龍相拘絞也戊承丁象人脅○釋名云戊茂也物皆茂盛○漢書云豐茂于戊○蔡邕云大撓探五行之情占斗綱所建於是始作甲乙以名日謂之幹作子丑以名日謂之支支幹相配以成六旬○箋云戊剛日也

伯

夏官校人云春祭馬祖夏祭先牧秋祭馬社冬祭馬步
注云馬祖天駟先牧始養馬者馬社始乘馬者馬步神
爲災害馬者○爾雅云天駟房也孫炎曰龍爲天馬故
房四星謂之天駟○孝經說云房爲龍馬○國語云農
祥晨正土乃脉發韋氏曰農祥房星也○晉書云房四
星爲明堂天子布政之宮也亦四輔也下第一星上將
也次次將也次次相也上星上相也南二星君位北二
星夫人位亦曰天駟爲天馬主車駕南星曰左驂次左

服次右服次右驂亦曰天廐又主開閉爲蓄藏之所由也房星明則王者明驂星大則兵起星離民流

禱

說文云禱告事求福也禱禱牲馬祭也詩曰既禡既禱○爾雅曰既伯既禱馬祭也注伯祭馬祖也將用馬力必先祭其先疏夏官馭夫春祭馬祖馬祖祭之在春其常也而將用馬力則又用彼禮以禱之○周禮庾人祭馬祖祭閑之先牧甸祝禱牲禱馬皆掌其祝號杜子春

云禱禱也爲馬禱無疾爲田禱多獲禽牲

庚

爾雅云太歲在庚曰上章○史記云庚者言陰氣庚萬物故曰庚○漢書曰欽更于庚○說文云位西方象秋時萬物庚庚有實也庚承巳象人齋○釋名云庚猶庚也堅強貌○孔氏云曲禮外事以剛日擇馬亦用庚爲剛日也

午

爾雅云太歲在午曰敦牂○史記云午者陰陽交故曰
午○漢書曰罟布于午○說文云午牐也五月陰氣午
逆陽冒地而出○孔氏曰擇馬用午日蓋於辰午爲馬
故也○漢書翼奉云南方之情惡惡行廉貞寅午主之
西方之情喜喜行寬大巳酉主之二陽並行是以王者
吉午酉也詩曰吉日庚午

麇

釋獸云鹿牡麇牝麇

麋

箋云麋牡曰麋○爾雅云麋牡麋牝麋

漆沮

禹貢雍州漆沮既從導渭自鳥鼠同穴東會于澧又東會于涇又東過漆沮入于河孔安國曰漆沮二水名亦曰洛○顏師古曰漆沮即馮翊之洛水也○蔡傳云漆水寰宇記自耀州同官縣東北界來經華原縣合沮水沮水地志出北地郡直路縣東今坊州宜君縣西北境

也寰宇記沮水自坊州昇平縣北子午嶺出俗號子午
水下合榆谷慈馬等川遂爲沮水至耀州華原縣合漆
水至同州朝邑縣東南入渭○水經漆水出扶風杜陽
縣俞山東北入于渭沮水出北地直路縣東過馮翊役
祠縣北東入于洛○水經注鄭渠在太上皇陵東南濁
水注焉俗謂之漆水又謂之柒沮其一水東出即沮水
也故濁水得柒沮之名東北流注于洛水

按漆沮二水名其源又各別故說者紛紛據孔安國

顏師古之說漆沮即洛水也朱子亦云漆沮在西都
畿內涇渭之北所謂洛水今洛水出陝西慶陽府環
縣經延安府甘泉縣鄜州宜君縣子午嶺至中部縣
入西安府界經耀州及同官縣至富平縣合沮水歷
蒲城同州至朝邑縣東南入渭乃周官所云雍州其
浸渭洛非伊洛之洛也寰宇記謂漆自同官來指此
竊意漆水即洛水也與扶風杜陽之漆不同一統志
不考乃云同官之漆出自鳳翔不知彼漆爲涇汭所

間豈能飛渡涇汭而來同官邪沮水出自延安府宜
君縣至子午嶺合子午水歷中部縣東南流入西安
府界至富平縣合漆水即洛也孔氏注禹貢漆沮亦
曰洛水是也但不當以沮并爲洛耳此馮翊之漆沮
也即此漆沮之從天子之所與潛猗與漆沮是也蓋
漆沮之會于同州者去鎬京三百餘里爾雅周之藪
曰焦獲焦獲近於漆沮其山多獸其水多魚取魚狩
獵之地當必此也書稱渭水東過漆沮亦是此漆沮

若出扶風漆縣者則在灋之上流與經之次序不合
矣其水經注所云濁水謂之漆沮者當在今臨潼縣
界未知今之土俗亦名爲漆沮否然濁水一小水注
鄭渠者耳非詩人所咏也一漆水出鳳翔府麟遊縣
西普潤廢縣故漢漆縣也流經岐山北大轡水自西
北注之南與杜水合齊詩所謂自杜沮漆者也其沮
之所在孔仲達云未聞此扶風之漆沮也縣詩云自
土沮漆指此何者不啻徙居戎翟之間在今慶陽府

公劉遷豳在今邠州淳化縣西廢三泉縣界當涇水之西其道甚便而沮在涇之東漆又在沮之東俱隔大山公劉初遷必不至馮翊之漆沮也及大王自豳遷岐踰梁山始至岐山北漆沮合流之處梁山在今西安府乾州城西北五里當豳之西南孔仲達縣詩疏云漆沮在豳地二水東流亦過周非也若漆沮在豳則公劉于豳斯館已有宮室大王何爲陶復陶穴哉但以大王初至扶風之地故陶復陶穴云耳又一

沮水出鞏昌府階州角弩谷東南入渭此別一水也
寰宇記云合榆谷水榆谷在臨洮去渭源近正謂此
沮水若延安沮水何由西行數百里至臨洮既至臨
洮又何由至西安之耀州耶

祁

箋云祁當作麋○爾雅云麋牡麋牝麋其子麋其跡纏
絕有力狄䟽云麋總名也詩吉日云其麋孔有○說文
云麋鹿屬也冬至解角○運斗樞云瑤光星散爲麋○

獸人云夏獻麋醢人朝事之豆昌本麋鷃菁苴麋鷃○
左傳莊十七年多麋注云麋多則害五稼○月令仲冬
麋角解熊氏云鹿是山獸夏至得陰氣而解角麋是澤
獸故冬至得陽氣而解角賈公彥云麋爲陰獸情淫而
游澤冬至陰方退故解角從陰退之象鹿是陽獸情淫
而游山夏至得陰而解角從陽退之象若節氣早則麋
角十一月解故夏小正云十一月麋角隕墜若節氣晚
則十二月麋角解故小正云十二月隕麋角○莊子云

麋與鹿交又曰麋鹿食薦○陶隱居云麋千百爲羣多
牝少牡人言一牡輒交十餘牝交畢即死其脂墮土中
經年人得之方好名曰遁脂○埤雅云白虎通曰熊爲
獸巧猛麋爲獸迷惑故天子射熊諸侯射麋麋水獸也
青黑色肉蹄一牡能乘十牝角自生至堅無兩月之久
大者乃重二十餘斤其堅如石計一夜須生數兩此骨
血之至强者

客

周禮大宗伯以饗燕之禮親四方之賓客大行人掌大賓之禮及大客之儀注云大賓要服以內諸侯大客謂其孤卿小行人大客則擯小客則受其幣而聽其辭疏云大客爲要服以內諸侯之使臣小客謂蕃國諸侯之使臣○孔疏云天子所賓客惟諸侯耳對文君爲大賓臣爲大客散則賓亦客也

醴

周禮酒正辨五齊之名二曰醴齊注云醴猶體也成而

汁滓相將如今甜酒矣○明堂位云殷尚醴○韓詩說
云醴甜而不洌也○說文云酒一宿熟也○孔疏云醴
不可專飲天子於羣臣不徒設醴而已此言酌醴者左
傳天子饗諸侯每言饗醴命之宥是饗醴者天子飲酒
之敬故舉醴言之也

六家詩名物疏卷三十五